

Thursday, December 4, 2025

Time - 2:30pm

## TAXATION DEPARTMENT

Sorkar kum kal mekah April atanga November, thla 8 chhungin Taxation department chuan kawng hrang hrang atangin chhiah cheng nuai 86,523 a hmu tawh a; thla liamta November khan cheng nuai 7,909 a hmu.

Taxation department-in Mizorama chhiah hmuh zat (monthly/annual achievement)-a tarlan danin, kumin April - November thla chhung khan kawng hrang hrang atangin chhiah cheng 86,523 hmuh a ni a; Goods & Seviles Tax (GST) atangin cheng nuai 7,279 hmuh niin, chhiah hmuhna tam ber a ni a, GST atanga chhiah hmuh hi Taxation department-in chhiah a hmuh zawng zawng atangin za zela 90 point 3 a tling a ni.

November thlaah hian GST dawta chhiah hmuh tamna ber chu Sales Tax niin, cheng nuai 325 hmuh a ni a, a dawttu Profession Tax atangin cheng nuai 117 hmuh a ni.

Petrol leh diesel atanga sorkarin chhiah chi hnih a lakna Road Maintenance Cess leh Social Infrastructure & Services Cess atangin cheng nuai 93 ve ve hmuh a nih bakah Entertainment Tax atangin Rs 10,000 hmuh a ni bawk.

Sorkar kum kal meka thla 8 chhung hian GST atangin cheng nuai 61,599 hmuh ni tawhin a tam ber a; Sales Tax atangin nuai 16,962, Profession Tax atangin nuai 1,313, Road Maintenance Cess leh Social Infrastructure & Services Cess atangin cheng nuai 3,323 ve ve bakah, Entertainmet Tax atangin Rs 50,000 hmuh a ni tawh a ni.



## RODENT

Kumina Thingtam lo thlengah Mizoram district 11-a kuthnathawktu chhungkua 5,317-te buh leh bal leh thlai thar tur beisei atanga za zela 42 point 06 chu sazu puangin an seh chhiatsak a; Mizoram sorkara Disaster Management & Rehabilitation department hnenah Agriculture & Farmers Welfare department chuan Thingtam vanga sazu puang hi State Specific Disaster-ah puang turin an ngen a, mahse, State Specific Disaster a puan kher ngai loin State Disaster Respond Fund hnuai norms awmsa atangin sazu puang tuartu loneitute hnenah tanpuina pek a ni dawn.

Disaster Management & Rehabilitation department hotute hnen atanga Akashvani News, Aizawl thudawn danin, rawthing tamin a hrin sazu puang vanga loneitute harsatna tawh hi Agriculture department chuan State Specific Disaster a puang turin an ngen a, Amaherawhchu sazu puangin loneitute buh leh thlai a khawihchhiat vanga tanpuina pek tur hi State Specific Disaster-a puan kher ngai loin SDRF Norms-a pest attack hnuai tanpuina hi pek theih a nih thu an sawi a; sazu puang tuartu loneitute hi DC-ah an report a, verification tih a nih chuan pek theihsa a nih thu leh hmalak zel dan tur chu sorkar hotuten an ruahman dawn thu an sawi.



## CHIEF MINISTER

Chief Minister Pu Lalduhoma vawiin khan Aijal Club-ah Mizorama sorkar hriatpui bank awm zawng zawngte intawhkhawmna leh an hnathawh thlirletna State Level Bankers Committee (SLBC) for the quarter ending September 2025 chu khuallian niin a hmanpui.

Pu Lalduhoma chuan CD Ratio nei tha bank pathum MRB, SBI leh Apex Bank te chungah lawmthu sawiin bank thenkhat, loan pe chhuak tlem leh lutuk, national benchmark phak lo leh lutukte erawh chu en liam chi anni lo a ti a, CD Ratio nei hniam ber, 5.30% chauh tlin phak bank pakhat chu an insawifiahna a hnena thehlut rang turin a hriattir a ni.

Bank te hi an sum dawn tlingkhawm atanga teha zaa sawmruk (60%) tal mipuite hnena puktir tura beisei an ni a. Hei hi an hnathawh tehna langsar taka hman a ni thin. Tun SLBC report-a a lan danin YES bank, Bandhan bank, SSFB, AXIS, HDFC, ICICI leh CBI te CD ratio chu 31% aia hniam vek an ni.

Chief Minister chuan, Mizoram sorkar chuan mitin ban phakah bank te hi inzarparh tura a duh thu sawiin tuna branch awm mek 278 zinga 183 te chu Aizawl, Lunglei leh Kolasib-ami annih thu sawiin a dang 95 te chu district dang pariatah an inzarparh a ti a. Mizorama bank branch tam takah thawktu an tlem thin avangin mipui tan an tangkai tur angin an tangkai zo lo thin tih sawiin Hnathawktu indaih tawk tak dah tum theuh turin bank thuneitute a ngen bawk.



## **ARCHEAOLOGICAL EXCAVATION**

Tunlai thiamna hmanga pi pu sulhnu hlui hai chhuah hna - Archaeological Excavation Thawhnhina (Phase-2) chu, nimin khan Khawbung BDO Pi Lalchhandami Pachuau chuan Champhai District a Dungtlang hmun hluiah a hawng.

Pi Lalchhandami Pachuau chuan, pi leh pute sulhnu, Mizo Archaeologist thiam tak tak te'n an hai chhuak chho mek chu Tuipuiral tlangdunga pi pu sulhnu chanchin zirchianna atan a hlu hle dawn tih a sawi a. Pi leh pu te chanchin hi thua inhlanhhawn (oral tradition) ringawt chuan, tunlai zirmite tuihalna a phuhru pha tak tak lo nia sawiin, hetiang hmalak a nih theihna atan ngaihtuahna, tha leh zung tam tak sengtu te chu fakawm a tih thu a sawi bawk.

Hma latu zinga mi Dr Lalminghlua chuan, nikum thal laia an laih tawh atanga a lan danin Dungtlang hmun hluiah hian, hun bi hrang hrana mihring lo chen tawhna chhawng thum (three layers) a awm tih sawiin, heng hun bi hrang hranga hun leh kum erawh a chhutna turin sample an la la kim thei lo tih a sawi. A thawh hnihna hna tan lehah hian carbon dating tur emaw, thermo-luminescence dosimeter emaw hmanga teh tur sample tha an hmuh theih ngei a beisei tih a sawi bawk a ni.

Tuna Dungtlang hmun hluia pi pu sulhnu hlui zirchianna (Archaeological Excavation at Dungtlang old Settlement site, Champhai District) hi North Eastern Council, Shillong atanga sum hmuh niin Art & Culture Dept leh Higher & Technical Institute of Mizoram ten an buaipui a ni.



## **RUSSIA PRESIDENT**

Russia President Vladimir Putin chuan ni 2 cham turin India alo zin dawn a, India- Russia Annual Summit wawi 23na pualin wawin hian New Delhi a thleng dawn a ni.

Naktuk hian Prime Minister Narendra Modi nen an inbia anga, he hun ah hian ram tan thil pawimawh tak te an sawi dun dawn a, inremna engemaw zat an ziah dun beisei a ni bawk.

President Droupadi Murmu pawhin Russia President hi alo hmuak dawn a, lo lawmna ruai alo buatsaaihsak dawn bawk a ni.



## **SRI LANKA**

Sri Lanka a cyclone avanga thi zat chu mi 479 an tling tawh a, mi 350 chuang chinhriatloh an la awm a ni. Sri Lanka thipui tleh avang hian thi leh hlaim leh bungraw chhia a tam emem a, India chuan heng chhiatna tuar te tanpui na tur hian Operation Sagar Bandhu a din a, chhiat tawkte tanpui hna nasa takin a thawk a ni.

